

Headlines

1. मुखमन्त्री उमर अब्दुल्ला होरें आखेआ ऐ जे सरकार बिजली दिएं दरें की किफायती रखदे होई लोकें दे कल्याण गी लगातार तरजीह देआ करदी ऐ।
2. मुखमन्त्री होरें किश्तवाड़ जिले दे दच्छन इलाके च अगग लगने करी केई ढांचें दे सोआहू होई जाने पर डूंगा दुख ते बसोस बुज्जेआ ऐ।
3. भारत दी तकनीकी ते वैज्ञानिक यात्रा च 2025 ब'रा बड़ा नतीजाकुन साबत होआ ऐ।
4. भद्रवाह च औंदी 17 ते 18 जनवरी गी स्याले आहले महोत्सव दा आयोजन कीता जाहग, फरवरी म्हीने डोडा च राफ्टिंग दे कार्यक्रम आयोजित करने दी बी योजना ऐ।
5. राश्ट्री जरनैली शिड़कें सरबन्धी भारती प्राधिकरण एच.एच.ए.आई नै नमें कार फास्टैग जारी करने लेई Know your vehicle card बंद करी दित्ते ना।

<><><><><><>

CM-Power Tarrif

मुखमन्त्री ओमर अब्दुल्ला हुं'दे दफ्तरै सोशल मीडिया हैंडल एक्स पर आखेआ जे सरकारै बिजली गी सस्ता रक्खियै लोकें दी भलाई बेह्तरी गी पहल देना जारी रक्खे दा ऐ ते दस्सेआ जे 2025-26 ताई जम्मू-कश्मीर आमतौरा पर बिजली कराएं च कोई बाद्दा नेई कीता गेआ ऐ ते ToD बिजन बदलाव दे रौहग। मुखमन्त्री हुं'दी नुमायंदगी आहले उर्जा विकास मैहकमा पीडीडी नै दस्सेआ जे सरकार जम्मू ते कश्मीर दौनें खितें च बिजली दी खपत गी Grant in Aid देइयै राजस्व दे घाटे गी पूरा करोग।

<><><><><><>

CM-Kishtwar Fire

मुख्यमंत्री ओमर अब्दुल्ला होरें किश्तवाड़ जिले च दच्छन इलाकें दे ग्रांऽ तचना च लगगी दी अग्न पर गहरी चैंता प्रगट कीती ऐ। ध्यानजोग ऐ जे इस अग्न च केई घरे-इमातरें गी नकसान पुज्जा ते नेकां परेआर प्रभावित होए। मुख्यमंत्री हुं'दे दफतरै आसेआ सोशल मीडिया पर सांझी कीती गेदी इक्क पोस्ट च मुख्यमंत्री होरें जिला प्रशासन गी प्रभावित परोआरें गी तुरत राहत यकीनी बनाने, होए दे नुकसान दा जायजा लैने ते लोड़चदी मदद करने दे हुक्म जारी कीते। अग्न वीरवार चिरें रातीं लगगी ही जेदे नै बड़ु पैमाने पर तबाही होई नेकां लोक बेघर होई गए। शुरूआती खबरें थमां पता लग्गा ऐ जे अग्न च नेकां मवेशी जलियै मरी गे न।

<><><><><><>

Year End Reforms

ब'रा 2025 भारत दी विकास यात्रा च इक महत्वै आह्ला पड़ाऽ रेआ। इस ब'रै नीतियें गी तरक्की च ते इरादें गी असर च तब्दील होंदे दिक्खेआ गेआ। अज्ज टकोहदी श्रृंखला, सुधारें दा ब'रा च अस्स तुंदे लेई 2025 दरान तकनीकी सैक्टर च भारत दी तरक्की बारै दस्सा करने आं। 2025 च भारत नै बड़ु पैमाने पर निवेश ते संस्थागत सुधारें कन्नै टेकनालजी अपनाने थमां टेकनालजी बनाने बक्खी गैऽ पुट्टी। इस ब'रे ए.आई सैक्टर च बड़ी मती तरक्की दिक्खने गी लब्बी। हाल च गै स्टैनफोर्ड युनिवर्सिटी दी 2025 ग्लोबल ए.आई वाइब्रेंसी रैंकिंग च देस त्री थाहै पर पुज्जी गेआ। 2025 च सैमीकंडक्टर ते एडवान्सड मैनुफैक्चरिंग च बी फैसलाकुन प्रगति दर्ज कीती गेई। इस ब'रै अंतरिक्ष ते रणनीतिक प्रौद्योगिकी च बी महत्वै आह्लियां उपलब्धियां हासल कीती गेइयां। इन्दे कन्नोकन्नी परमाणु उर्जा ते साइंस च बी संरचनात्मक सुधार होए।

<><><><><><>

Community Radio Rajouri

राजौरी जिले च कब्जा रेखा कन्नै लगदे ग्रांऽ केरी च कम्युनिटी रेडियो स्टेशन रेडियो संगम दे औपचारिक उद्घाटन मगरा एहू जमीनी सतह पर दूर संचार ते नागरिक सैन्य सहयोग गी तगड़ा करने च इक्क महत्वैअ आह्ला मील दा पत्थर साबत होग। रेडियो संगम दा उद्घाटन राजौरी दे डी.सी अभिशेक शर्मा होरें कीता, जेड़े इस मौके बतौर मुख परौहने उत्थें मौजूद हे। अपने संबोधन च उपायुक्त होरें जमीनी सतह पर संचार गी मजबूत करने, मकामी संस्कृति गी बचाने

ते समावेशी विकास गी बढ़ावा देने च कम्युनिटी रेडियो दी महत्वै आहली भूमिका पर लोऽ पाई।

<><><><><><>

NCORD-Ramban

जिला प्रशासन रामबन नै जिले च नशीली दोआइयें खलाफ चलाई जा'रदियें मुहिमें-अभियानें दी समीक्षा करने ते उ'नेंगी होर बी तगड़ा करने ताई जिला सतह दी नारको तालमेल कमेटी कन्नै इक बैठक लाई। मैहकमे दे अफसरें गी केमिस्ट दी दकानें पर नगरानी बदाने ते दमागै पर असर पाने आहिलें दोआएं दी गैर कनूनी बिक्री ते गलत इस्तेमाल रोकने आस्तै स्टॉक दी जांच करने लेई आखेआ। ड्रग कंट्रोल मैहकमा रामबन नै कनून नाफज करने आहिलियें एजेंसिएं गी कूरियर केंद्रें, मेडिकल संस्थानें ते होर शुबे आहिलियें थाहें पर सख्त नगरानी रखने दे हुक्म जारी कीते तां जे नशीली दोआइयें दी तस्करी करने आहलें दी नकेल कसी जाई सकै।

<><><><><><>

Winter Fest

पैहली जनवरी 2026 थमां शुरू होऐ दे शिड़क सुरक्षा म्हीने दे इक हिस्से दे तौरा पर जिला प्रशासन डोडा नै जिले च लोकें गी जागरूक बनाने, सैलसफा ते सुरक्षित यात्रा दे तौर-तरीकें गी बढ़ावा देने दे मकसद कन्नै कई बड्डे कार्यक्रमें दी योजना बनाई दी ऐ। सैलसफा विभाग दे सहयोग कन्नै जिला प्रशासन आसेआ 17 ते 18 जनवरी गी भद्रवाह च विंटर फेस्ट दा आयोजनकीता जाहग जेहड़ा म्हीने भर चलने आले इनें कार्यक्रमें च इक मुख् आकर्षण होग। फरवरी म्हीने च राफ्टिंग दे इक कार्यक्रम दी बी योजना बनाई गेदी ऐ कीजे इये नेहूी खेड्ड गतिविधियां न। छड़ा सैलानियें गी आकर्षित करदियां न, सगुआं मकामी नौजवानें लेई कम्म - रोजगार दे मौके बी उपलब्ध करोआंदियां न।

<><><><><><>

NHAI-KYV

राष्ट्री जरनैली शिड़क सरबन्धी भारती प्राधिकरण एन.एच.ए.आई नै अज्ज आखेआ ऐ कि अगले म्हीने दी पैहली तरीक सवां सब्बै नमें फास्टैग जारी करने लेई कारें दे Know your vehicle यानि KYV कार्ड बंद करी दित्ते जाडन। जरनैली शिड़क ते सड़क ट्रांसपोर्ट मंत्रालय नै आखेआ कि एहू कार्रवाई जरनैली शिड़कें पर गड्डी चलाने आहले दी सुविधा ते फास्टैग एक्टिवेशन दे बाद पेश औनी आहली परेशानी गी खत्म करने लेई कीती गई ऐ। मंत्रालय नै इब्बी आखेआ ऐ जे छड़े शकैत आहले विशेष मामले च गै KYV कार्ड जरूरी होग ते जेकर कोई शकैत नेई थ्होंदी तां मजूदा कार फास्टैग लेई KYV कार्ड दी लोड नेई होग।

<><><><><><>

Essay-Competition

देसै दे 77में सुतंत्रता दिवस दे मौके पर जम्मू-कश्मीर सूचना ते जनसंपर्क विभाग नै नौजोआनें गी ऑनलाइन निबंध लेखा प्रतियोगिता-2026 च हिस्सा लैने लेई साद्दा दित्ता ऐं प्रतियोगिता दा सिरलेख ऐ मेरा संविधान मेरा गौरव। इस मकाबले च शड़ा जम्मू-कश्मीर दे बसनीक गै हिस्सा लेई सकदे न ते उंदी उम्र 18एं बरें शा बद्द नेई होना लोडचदी। eassay च बद्द कोला बद्द 200 अक्खर होने लोडचदे ते एहू हत्थ कन्नै लखोए दा होना लोडचदा ऐ। पहलियें त्रै थाहें पर औने आहले मेदवारें गी 10 ज्हार, 7500 ते 5000 रपे दे नकद ईनाम दित्ते जाडन। निबंध जमा करोआने दी तरीक 20 जनवरी 2026 ऐ।

<><><><><><>

Weather

इस मौसम दी पैहली बर्फबारी दा लम्मा इंतजार कल खत्म होई गेआ कीजे जम्मू-कश्मीर दे उप्परले हिस्सें च हौली बर्फबारी होई जेह्दे कन्नै मुकामी लोकें ते सैलानियें गी बड़ी मती खुशी होई। पुंछ ते भद्रवाह च दरम्याने शा भारी बर्फबारी दी खबर ऐ। उत्साह कन्नै भरोचे दे सैलानिएं इस बर्फबारी गी कुदरत दा तोहफा करार दिंदे होई मेद बुज्झी जे एह्दे कन्नै सुक्के मौसम करी प्रभावित इलाकें च सैलसफा गी बढ़ावा थ्होग।

एहदे अलावा उच्ची थाहें आहले इलाके, जिंदे च साधना दर्रा जित्थे तकरीबन 6 इंच, गुरेज ते तुलैल च 8 शा 12 इंच बर्फबारी होई जिसलै के सोनमर्ग-जोजिला रस्ते पर 5 शा 8 इंच बर्फबारी होई। गुलमर्ग च बी तकरीबन 2 इंच बर्फबारी होने दी खबर ऐ।

<><><><><><>

JKBOSE-Syllabus

जम्मू-कश्मीर स्कूल शिक्षा बोर्ड नै दसमी- 11मीं ते बारहमीं जमात दे विद्यार्थियों दे फेल रीपियर ते नमें सिरेया प्राइवेट स्तेहान देने आहले लेई पुराने सिलेबस गी अधिकारिक तौरा पर खत्म करी दिता ऐ। बोर्ड नै आखेया ऐ जे विद्यार्थियों गी पैहले गै पिच्छले नियमें तैहत केई मौके दिते गेदे हे ते हून एह स्कीम पुरानी होई चुकी दी ऐ। बोर्ड आसेया जारी इक अधिसूचना मुजब- पुराने सिलेबस दे तैहत हुन अगो कोई स्तेहान नेंई लैता जाग। मेदवारें गी सलाह दिती गेई ऐ जे ओह 2026 ते एहदे मगरा होने आहले सलाना प्राइवेट जां बरे च दो बारी होने आहले स्तेहानें लेई नमें सिलेबस मताबक तयारी करना।

<><><><><><>